

四庫全書薈要·乾隆御覽本

集部

御定歷代賦彙卷一百三十

鳥獸

鵲賦

梁

徐勉

觀羽族之多類實巨細以羣飛既若雲而彌上亦棲睫而忘歸爰有茲禽六翮斯具生無隱嘿質有立素匪違涼而就暑通四節以馳驚出崑山而抵玉入召南而興賦其識知來其巢知風比之烈士時起則雄逢翳蒼而

翔集乘清吹而西東荷休明以得性游苑囿以自終

鵲賦

明 李東陽

爰有靈鳥集於中林修尾長喙玄衣素襟皦皦奇質冷
泠警心我有嘉辰懷此好音若夫飛蔓峻閣繡闥雕楹
旭日初照纖颺不生茂樹芳潔繁陰翳清忽促刺以雙
透歛璇玕而迅征刷凝鮮之委羽寫婉轉之幽情紛衆
啁以爭墜屢馴飛而不驚晴雪衝騰其下上閒華匝地
而縱橫爾其乍東乍西倏近倏遠棲初危而不定去未

極而中返或周旋其却顧或擊捷其將轉方小佇於中
庭誤遲歸於別館曳餘音於未絕裊柔條之半綰若乃
玉關遷客金屋佳人淹沈幽囿之士雜遝高軒之賓託
春心於錦字迓曙色於雕輪聽泥金之小敕擁織翠之
重茵曉枕驚夢春山罷顰莫不窮途拭淚幽谷生春或
擎杯以酌地或倒屣而迎門啜村鷓於牖戶怪野鵬於
承塵不利俗以投好徒增疑而召嗔試比物以引類信
茲禽之足珍乃有上苑虞人五陵年少挾孤彈於懷中

探危巢於木杪智藏乎其無形禍出其所不料豈百金
之足圖曾不滿夫一笑物固有所偏工意固有所獨適
故知來歲之風不能比一卵於終日報羅幃之喜不能
解雙顏於漆室彼世態之無常徒因之而太息復有梁
州金印月浦銀橋羨崔梁之窈窕駭魯木之翔翺信恍
惚而莫究徒夸浮而可嘲吾將使茂先卷舌而却走成
式遁辭而先逃見天機之流轉知造物之非雕坐觀物
以自適聊寄情乎離騷

鵲賦

明
李夢陽

有翩翩之珍鳥秉陽剛而含哲擇喬幹而託處信于飛
而頽頽性靈達而好靜恒相時而豫移知多風之害患
則徙巢於下枝善傳祥而遞音類明士之幾悟豈林巖
之遐閒遊庭松而棲寓虞矰弋之見尋於君子乎是依
飲九霄之曙露啄嘉實之離離黃鐘厥月天地閉藏雪
霰紛其交下烈風嚴而雨霜羣植寥乎未坼諸動潛於
深密羨斯鳥之前覺獨銜槁而營室隆象天體方則地

矩義備晦明智敵風雨諳擊衝之玄括背太歲而啓戶
諒綢繆之軫心黯拮据而誰語嘅春陽之未臨聊俟時
而共嬉感主人之隆篤戒彈矢而罔欺步玉除以免啄
微風跂而自閒冀融景以驟躍昂清雲而拂旋激神化
以耀德逢印文而幻遷庶遺安於衆鳩順天命而自然

鵲始巢賦

唐
陳仲師

霜天慘慘兮楓樹之杪構彼層巢兮翩然宿鳥晒喬柯
以上下慙弱羽之卑小周匝經營翻飛繚繞履危而金

彈不發送喜而珠簾乍開逐初心之眷戀無利嘴之嫌
猜架木末居巖隈容足之前望一枝以棲息翻身之際
歷衆木以飛來拂曙聲多排空意遠惜光陰於朝暮迷
飲啄之往返於是攫腐草銜飛蓬重疊尺筵迴環翠空
凌寒而且近朝日構思而偏愁夜風俯仰求容冀思拾
芥之力縱橫居止顧就積薪之功必使輕舉得便羣飛
會同遊嬉遂鄰於清籟窈窕長謝其雕籠所謂摭實以
來憑虛相借不然則六翮摧毀三冬徂謝飛鶯將出乎

深谷黃雀亦誇其大廈所以踰遠林戾前除仰窺肅爽
遠慕扶疎當繞樹之時暫隨烏會在來巢之日常畏鳩
居非微禽之敢競幸嘉木之有餘嗟乎搖尾馴擾斂容
萃止依於主人來若處子匪能言以呈慧不善舞以招
美倘抵玉無虞搏風資始故巢林以何報惟化印而後
已

鵲巢背太歲賦

唐

陳仲師

營巢有因惟鵲無倫始自小寒之日不當太歲之神辨

向背以經營必先避地顧縱橫而委積足以藩身且其
矯翼徘徊向隅棲息時懷擇木之智日就積薪之力若
在離宮之內不可巢南如當子午之中無因逐北所以
率先表異選勝知歸應時節而遷易辨方隅之是非念
彼明神自易地而攸處顧茲弱羽信何枝而可依時也
苟遂居安寧辭力役銜腐草而構思向高柯以容跡動
觀所忌殊古人之槽巢理契不齊如方士之工厯擇地
已有知風豈無方一枝而自託雖小數之能拘且相質

以和鳴喜同於雀乃卜居而類聚趨甚於鳧况復藉用
茅茨殊荷庇蓋任風雨而自適豈陰陽而去泰念土宜
之是顧足見知方信天理以自然焉能向晦爾乃節屆
玄律時方返寒顧地角而知禁豈天時之可干無起土
功異銜泥而戾止知於歲杪聊寓跡以求安既而飲啄
無虛推移不滯得厭勝之良術誠棲遲之上計潛軫明
條之慮必附枳枸之勢摧枯拉朽已完葺於崇朝命侶
引雛聊優游於卒歲顧末俗之無違信微禽之可繼

鵲巢賦

明
鍾惺

繫舟西梁山下有垂楊數樹童然而其一鵲巢其上者
柔條獨起春發其色土人云以鵲巢之故得免剪伐感
鳥能庇木而氓之蚩蚩並育之意憫然著於動植充類
識端可以見天心焉爰作斯賦

維鳥與木之偶然初何心而相附雖靈鵲之擇木乃枯
楊兮其焉慕方夫牖戶綢繆飛鳴拮据倦形聲之相喧
恐桑土之我汙爾其冬餘春初燒荒刊路衆林童然偏

何獨茂蓋已烟日之向新胡止條枝之如故彼樵者之
蚩蚩兮何秉心之獨恕曰觀巢卵之相為命兮羌更意
而懷顧曰子曰室匪木曷據曰葉曰枝匪鵲焉護此風
雨蛇鼠之無虞彼斧斤樵薪之不慮辟彼伯鸞之借枝
於廡下兮暴客過而反步匪伊門庭之有光兮亦外侮
之克禦夫既或惠我以美陰兮胡不報之以雨露乃人
心之動於物類兮獨並存而同豫重曰有柳依依有鵲
棲棲疇道善氣疇過殺機生殺感應惟危惟微充類循

本靈蠢同歸人天沙界佛土王畿永無戕和探鼓折枝

馴爲賦

唐
王勃

海上兮雲中青城兮絳宮金山之斷鶴玉塞之驚鴻謂
江湖之漲不足憩謂宇宙之路不足窮終銜石矢坐觸
金籠聲酸夕露影怨秋風已矣哉何氣高而望闊卒神
頽而智瘡徒騫迹於仙遊竟纏機於俗網未若茲禽猶
融泛想慙丹丘之麗質謝青田之逸響與道浮沈因時
俯仰去非內懼馴非外獎夫勁翮揮風雄姿觸霧力制

煙道神周天步鬱霄漢之弘圖受園庭之近顧質雖滯
於城闕策已成於雲路陳平負郭之居韓信昌亭之遇
似達人之用晦混塵濛而自託類君子之含道處蓬蒿
而不忤悲授餌之徒懸痛聞弦之自落故爾放懷於誕
暢此心於寥廓

馴鳶賦

唐

盧照鄰

孕天然之靈質稟大塊之奇工觜距足以自衛毛羽足
以凌風懷九圍之遠志託萬里之長空陰雲低而含紫

陽景升而帶紅經過巫峽之下惆悵彭門之東旣而摧
頽短翮寥落長想忌蒙莊之見欺哀武溪之莫往進謝
扶搖之力退慙歸昌之響腐食多懼累巢無象屈猛性
以自馴抱愁容而就養於是旁跳德門言棲仁路不踐
高梁之屋翔止吾人之樹聽鳴雞於月曉侶羣鵲於星
暮狎蘭砌之高低翫荆扉之新故循廣庭之一息歷長
檐而徑度若乃風去雨還河移月落徘徊亂於雙燕鳴
舞均乎獨鶴乍哨聚於霞莊時追飛於雲閣荷大德之

純粹將輕姿之陋薄思一報之無偕欣百齡之有託

鳶賦

宋 薛士隆

嗟萬彙之叢夥慶稟天而自性或同類而殊時亦異情
而一命惟孤鳶之挺質兼鷹隼之神俊凜凌烈之宏厲
颺飛揚以時奮真鷲鳥之英標而搏扶之匪迅者也豈
皇蒼之好德毒鵙鷃之靡仁損威稜於搏擊餘毛羽之
形存忍癡腸之屢空曠爪吻其徒云彼燕雀之何知唧
啣喧乎大廈怛拳如之文鷁蹇桀然為何者鷁孔微而

云罄顧匪甘乎乃下相彼翎之文著觀眇瞿其矍落六
翮翹其招搖上且憑於無莫何嗜樂之卑汚食孔甘於
腐璞舍血飲而毛茹牲體陳而肉攫睢盱漫其何以耿
含靈之是度茲有以得侮於羣雛而為禽之彼薄也走
觀物之資性渺百生之誠一彼目狼以兢戰蒙虎皮而
羊質舞獅人之為誑陣象轟其駭逸匪葉公之知畫觀
降龍而心失曾不如小鳥之知不視形而忘實也慨高
飛之軒翥遠翱翔於寥廓振衣裳其楚楚爽精神之卓

犖母為是鳶識而鷹章近取輕於烏鵲

大雀賦

漢
曹大家

大家同產兄西域都護定遠侯班超獻大雀詔令大家
作賦曰

嘉大雀之所集生崑崙之靈丘同小名而大異乃鳳皇
之匹儔懷有德而歸義故翔萬里而來遊集帝庭而止
息樂和氣而優游上下協而相親聽雅頌之雍雍自東
西與南北咸思服而來同

鷓鴣賦

魏
曹植

鷓欲取雀雀言雀微賤身體些小肌肉瘠瘦所得蓋少
君欲相噉實不足飽鷓得雀言初不敢語頃來輾軻資
糧之旅三日不食略思死鼠今日相得寧復置汝雀得
鷓言意甚怔營性命至重雀鼠貪生君得一食我命是
傾皇天降鑒賢者是聽鷓得雀言意甚怛惋當死斃雀
頭如果蒜不早首服烈頸大喚行人聞之莫不往觀雀
得鷓言意甚不移目如擘椒跳蕭二翅我當死矣略無

可避鷄乃置雀良久方去二雀相逢似是公姬相將入
草共上一樹仍叙本末辛苦相語向者近出為鷄所捕
賴我翻捷體素便附說我辨語千條萬句欺恐舍長令
兒大怖我之得免復勝於兔自今從意莫復相妒

白雀賦

唐

闕名

彼白雀兮降靈朱方羽皎皎而冰淨毛紛紛而雪光既
無日浴不假雲翔馴階除兮五彩相照向庭際而花影
飄揚皓然自居賁以為飾與物無競隨時遊息知有文

而賈害則純素保光知惡紫之奪朱則太白呈色叶我
皇之金運旌我皇之道極又何貴乎黃以為名赤以為
翼然後銜丹書以告祉執玉環以述職所以異其類不
能同塵所以隨其俗將以順人不假倉以耗國不穿屋
以賊鄰刺穆公之將死以人為殉雪治長之無罪示人
有親無以為凡鳥也不撫其實無以為珍禽也不利於
物庶考言以察用時有得而無失若以酒成禮我則能
近取諸身若以農命官我則能將委其質百揆有序萬

物咸秩豈不知鴻鵠之志與斥鷃而為匹悲夫未處大
厦開於雕籠心眷戀兮猶期拂日羽摧落兮半已從風
望銅臺而路遠忿瑤池而宴終倘吾君兮為開一面呈
瑞兮還飛紫宮

鸚鵡賦 有序

漢
禰衡

時黃祖太子射賓客大會有獻鸚鵡者舉酒於衡前曰
禰處士今日無以娛賓竊以此鳥自遠而至明慧聰善
羽族之可貴願先生為之賦使四坐咸共榮觀不亦可

乎衡因為賦筆不停綴文不加點其辭曰

惟西域之靈鳥挺自然之奇姿體金精之妙質含火德
之明輝性辯慧而能言兮才聰明以識機故其嬉遊高
峻棲峙幽深飛不妄集翔必擇林紺趾丹觜綠衣翠衿
采采麗容咬咬好音雖同族於羽毛固殊智而異心配
鸞皇而等美焉比德於衆禽於是羨芳聲之遠揚偉靈
表之可嘉命虞人於隴坻詔伯益於流沙跨崑崙而播
弋冠雲霓而張羅雖網維之備設終一目之所加且其

容止閑暇守植安停逼之不懼撫之不驚寧順從以遠
害不違忤以喪生故獻全者受賞而傷肌者被刑爾乃
歸窮委命離羣喪侶閉以雕籠剪其翅羽流飄萬里崎
嶇重阻踰岷越障載罹寒暑女辭家而適人臣出身而
事主彼賢哲之逢患猶棲遲以羈旅矧禽鳥之微物能
馴擾以安處眷西路而長懷望故鄉而延佇忖陋體之
腥臊亦何勞於鼎俎嗟祿命之衰薄奚遭時之險熾豈
言語以階亂將不密以致危痛母子之永隔哀伉儷之

生離匪餘年之足惜，慙衆雖之無知，背蠻夷之下國，侍
君子之光儀，懼名實之不副，恥才能之無奇，羨西都之
沃壤，識苦樂之異宜，懷代越之悠思，故每言而稱斯若
乃少昊司辰，蓐收整轡，嚴霜初降，涼風蕭瑟，長吟遠慕，
哀鳴感類，音聲悽以激揚，容貌慘以顛顛，聞之者悲傷，
見之者隕淚，放臣為之屢歎，棄妻為之歔歔，感平生之
遊處兮，若墟荒之相須，何今日之兩絕，若胡越之異區，
順欂櫨以俯仰，窺戶牖以踟躕，想崑山之高峻，思鄧林

之扶疎顧六翮之殘毀雖奮迅其焉如心懷歸而弗果
徒怨毒於一隅苟竭心於所事敢背惠而忘初託輕鄙
之微命委陋賤之薄軀期守死以報德甘盡辭以效愚
恃隆恩於既往庶彌久而不渝

鸚鵡賦

魏

曹植

美洲中之令鳥越衆類之殊名感陽和而振翼遁太陰
以存形遇旅人之嚴網殘六翮而無遺身絀滯於重縲
孤雌鳴而獨歸豈予身之足惜憐衆雛之未飛分糜軀

以潤鑊何全濟之敢希蒙含育之厚德奉君子之光輝
怨身輕而施重恐往惠之中虧常戰心以懷懼雖處安
其若危永哀鳴其報德庶終來而不疲

鸚鵡賦

魏

王粲

步籠阿以躑躅叩衆目之希稠登衡幹以上干噉哀鳴
而舒憂聲嚶嚶以高厲又惻惻而不休聽喬木之悲風
羨鳴友之相求日晡靄以西邁忽逍遙而既冥就隅角
而斂翼倦獨宿而宛頸

鸚鵡賦

晉

桓玄

有遐方之令鳥超羽族之拔萃翔清曠之遼朗棲高松
之幽蔚羅萬里以作貢嬰樊紕以勤瘁紅腹楨足玄頷
翠頂草好音以遷善效言語以自騁剪羽翮以應用充
戲玩於軒屏

鸚鵡賦

晉

傅咸

有金商之奇鳥處隴坻之高松謂崇峻之可固然以慧
而入籠披丹脣以授音亦尋響而應聲眄明眸以承顏

側聰耳而有聽口纔發而輕和密畧景而隨形言無往而不復似探幽而測冥自嘉智於君子足取愛而揚名

鸚鵡賦

唐

李伯藥

嘉靈禽之擢秀資品物以呈祥含金精於兌域體耀質於炎方候風海而作貢備黼黻以成章繡領綺翼紅衿翠裳飾以朱紫間以玄黃碧雞仰而寢色金鷲對以韜光亘萬里之重阻隨四夷而來王既逾嶺以自致亦凌江而遠翔開神情之聰辯發樞機而抑揚粵惟上聖先

天成命在萬物而畢覩舉四海而咸鏡仁沾草木信暨
翔泳咨此鳥之來儀亦攝生而遂性辨方物於圖象具
靈表於言詠酬對清敏發吐祥正實靡靡而可悅雖喋
喋而無競徘徊阿閣容與堂皇背風雲之遐路承日月
之休光聽簫韶之逸響味椒掖之餘芳更無歎於羅罽
終懷恩於稻梁齊鵬鷃於一指屬鷓鴣而兩忘翠融孔
質鴻騫鸚跼應舞節以鸞回慕知來而鵲起先假道於
朱味方徐行於紺趾配六象以表德參四靈而效祉庭

開霧夕景淨霞空乍褰珠網始出金籠遊萬年於木末
翫四照於花叢窺仙盤而飲露登井幹以承風懷故鄉
之遠思戀羈雌之舊侶望天衢以寄聲託歸飛而延佇
不假物以自衛必任真於出處以薄伎而見知亦無憂
於鼎俎不違道以飾智故忘情於所語豈止往來丹陛
周旋玉除悅芝英之藿靡愛莫莢之扶疎將以整六翮
而遐逝望一舉而沖虛希九成之兆吉覲七日以傳書
時光華而始旦歲蹉跎而遽晚彼候鴈與賓鴻違風霜

而未返嗟銜蘆以避繳恨日暮而塗遠羨嚶嚶之好音
獨遷喬於上苑仰上林之爽塏襲崑閬之重規實神秘
之棲息萃羣飛之羽儀翔靈囿遊天池翳叢薄汎漣漪
況能言之擅美冠同類以稱奇奉皇恩之亭育將謝生
而莫施惟一人之有慶願千歲其若斯

鸚鵡賦

元
張養浩

亳州人來云張庭美賦鸚鵡者三切念禰衡之後一猶
難繼矧其三乎近乃獲其文讀之其屬辭比事摹寫形

態殆無餘蘊麗則麗矣然未及擴而充之以裨世教以厚民風以規多口故余復為賦此用竟其義云

維羽族之三百為號異而靡同最其口之甚者舉推此為長雄韻笙簧於寸舌文錦毅於眇躬形雖儕夫禽鳥實兼人之慧聰緩呼之而輒應佯叱之而斂蹤聞市曹之衆咻亶無一而不通時擬聲以切效每驚稚而駭翁原夫天之生物羌一氣之所鍾惟人焉為至靈故親孝而主忠嗟他類之蠢然由稟受之失中或本下而未上

或足橫而首縱或語焉而弗答或挽焉而莫從胡於茲而獨異以能言而策功非前身為秦儀定隨陸之兩公世繇是而珍畜遂餌致於金籠欲求出而無計徒幽恨之塞胃尚不悟其階禍猶言巧而語工嘗聞善游者必溺乎水善射者必傷乎弓善飲者必中其毒善辯者必受其殃於戲吾始以汝為人之亞今乃知其至癡且拙而蒙也夫謹爾出話詩人所以美武公也仁而不佞聖門所以贊冉雍也駟不及舌子成所以見惜於子貢也

惟口起羞傳說之所以諫高宗也至於語云欲訥書載
興戎禮垂難悔易著乃窮漢史有嗇夫上林之鑑周廟
有像人緘口之銅佛至慈而好生亦設犁舌之獄於幽
壤天至高而莫犯猶有翕箕之星於太空凡此者皆所
以明慎默之為多福而禦人捷給之為極凶也且白圭
有玷可磨可礪斯言一失辱盈四封故傷人則過於戈
矛之刃害己則足為禍患之弓自古坐視敗亡者何可
枚舉而汝曾不聞之又何聾哉韓非自斃於說難蔡澤

竟挫於談鋒知伯氏以才佞而家無炊火國武子以亢直而身不見容韓生以沐猴而怒項羽王墮以雞狗而忤董龍張敞以私語而誅繁舜曹操以毀謗而戮孔融伯宗見讓於家室賀敦貽戒於兒童其他若太史司馬中郎蔡邕禰衡許攸嵇康韓博之徒於事無益咸禍之逢汝苟恣而不戒旦暮必將復見噬於武氏蒙貴之蟲也於是隴禽聞之若戚焉而不為歡棕者良久余亦歸而假寐有客見於朦朧綠予其衣金焉其瞳趾玉而碧

吻鈎而紅且躍且舞來前以告僕曰吾非不知樞機之
不密無以善始而令終然造物者賦余以如是之性胡
能廢而弗庸感子言之我厚拜子惠之我隆君其反而
自律吾何預於民風於是余乃蹶然而興遽然而悟悄
四顧其無人而耳根猶彷彿餘韻之雖雖

白鸚鵡賦

宋 顏延之

余具職崇賢預觀神祕有白鸚鵡焉被素履玄性溫言
達九譯絕區作貢天府同事多士咸竒思賦其辭曰

稟儀素域繼體寒門貌履立而被潔性既養而亦溫雖
言禽之末品妙六氣而尅生往秘竒於鬼服來充美於
華京恨儀鳳之無辯惜晨鷺之徒喧思受命於黃髮獨
含辭而採言起交河之榮薄出天山之無垠既達美於
天居亦儷景於雲阿漸惠和之方渥綴風土而未訛服
璫駟於短衿仰梢雲之曾柯覲天網之一布漏微翰於
山阿

白鸚鵡賦

以容日上海孤
飛色竭爲韻

唐

王

維

若夫名依西域族本南海同朱喙之清音變綠衣於素
彩唯茲禽之可貴諒其美之斯在爾其入翫於人見珍
奇質狎蘭房之伎女去桂林之雲日易喬枝於羅袖代
危巢於瓊室慕侶方遠依人永畢託言語而雖通顧形
影而非匹經過珠網出入金鋪單鳴無應隻影長孤偶
白鷗於池側對皓鶴於庭隅愁混色而難辨每知名而
自呼明心有識懷恩何極芳樹絕想雕梁撫翼時銜花
而不言每投人以方息慧性孤稟雅容非飾含火德之

明暉被金方之正色至如海燕呈瑞有玉筍之可依山
難學舞向瑤鏡而知歸皆毛羽之偉麗奉日月之光輝
豈憐茲鳥地遠形微色凌紈質彩奪縉衣深籠久閉喬
木長違倘見借於羽翼與遷鶯而共飛

白鸚鵡賦

以容日上海孤
飛色媚為韻

唐

闕名

稽聖人之遺文懿珍禽之不一彼善言之靈鳥孕聰明
以自逸苞火德之奇姿誕金方之素質匪含章以就隕
故遠時而襲吉憐碧山之孤高恃榮松之蔽密傳衆音

於清吹凝白華於皎日由是既飲既啄載留載飛觸雲
網以摧羽閉雕籠而見歸豈不由蓄素姿以羅患懷海
陰而遂遠雖失羣以傷指亦順人而可依登玉架覘朱
闌苟安性以知樂每求容而自微雪膚皎晶擯池鷗之
光潔霜毛瑩淨奪軒鶴之清輝且其翔不忘止居必任
側莫厭傳弄豈驚撫拭狎君子之光儀遠虞人之網弋
感珍念而矜眷託恩馴以棲息而愛其豐姿冰華全體
玉色匪鷓彩之爭妙何衆禽之比德呼名自應隔羅幔

而飛來教語半成學美人之漸逼故對綺琴而傾聽上
金屏而斂翼蒙正平之翰藻應司空之寵識夫玄默者
動之所求潔素者默之攸尚矧聰性以受緲悲惠心之
為亮抗幽意於霞表羨高儔於海上彼不材兮見留此
能言兮何妄或曰物惡近以招累理貴遠而無凶雖道
形以取美獨抱清而不從豈知夫善生者託人以遠害
能壽者輔德以自容是以承君子之恩渥獨蒙幸以遭
逢者也

白鸚鵡賦

以容日上海孤
飛色媚為韻

唐

郝名遠

珍禽生矣于彼南域稟離宮之淳精得金方之正色明
而且慧聰而多識雖羽族之殊流與人智而同德懿其
霜毛雪毳鮮襟皓臆明眸珠朗脩趾頰飾理駟整翰仰
雲路而翻飛自邇陟遐託風林以棲息及夫出層嶠集
高松刷勁翼端麗容遇天網之四掩獻君門於九重用
能辭羣別類重譯而至閉以雕籠處之丹地夫違忤則
傷性常順旨以從人乖背則喪生不貪榮以求媚爰遊

上都隻影長孤懷好音而願語每稱名而自呼當其踰
山越嶂萬里遐曠常恐微軀毀全無妄豈知承曲成之
惠渥奉君子之嘉貺朝食琅玕之實夜宿畫梁之上而
已哉顧慕多違自惜容輝夢鄉山而欲戀思恩波而不
飛獨有邈乎長想忻然志逸效彼珍寶瑞我帝室坐使
素烏惡彩白鷗慙質苦炎洲之愁霧嘉長安之聖日信
能言之見知接鶯谷而同出

白鸚鵡賦

有序

明
王世貞

鸚鵡純綠色以其喙紅黑為雌雄見鐵圍山叢談而白者紅者五色者最不易得北戶錄桂海志皆稱白者稍大於他鸚鵡冠有五羽若護華作輕黃色怒則盡張尾截如鴿外粉內密余從友人徐子與所見之果爾而靈慧秀俊依人可憐子與以余之喜之也舉籠以贈而徵賦焉其視正平不能髣髴視延年摩詰或差有致耳

猗西域之慧羽稟金方之淑潤頻迦授以仙音孟虧錫其美肩倘瑤池之托質何青鳥之傳信冠擬護而三秀

尾如鵠而偏俊若乃孕別雄雌喙分丹黑黑則片葉破
霜丹則微苞拆白豈辯口之象人實靈心之天錫忽乎
穿林閃銀梭之透機舒而飲泉儼螺觴之承瀝於是虞
人憇憇以進羅射師屏營而却弩雖靡逃乎一目幸毋
損其片羽強髣髴而就食中掩抑而思土塊焉獨處悄
然私語彼越裳之遙使何異德而並依此隴首之下倚
復質是而文非出入珠擘夷猶紫微感異夢於司空受
真經乎貴妃爾其性含雅馴度絕驚怒皓魄增輝飛霞

奪素壁人出則一市盡傾玉奴入則六宮爭妒何郎傅
粉以清言杞婦被縞而悲訴偶失身於罟網遂長辭於
林樾足何辜而見維翽奚妨而遭鍛嗟半菽之示恩均
轍泔以苟活顧壺冰以憐影臨綺廳而捫舌乃有謝豹
勸歸倉庚和歌聞音似友辨字則叱彼棲鷗之濯濯或
舞鶴之傴傴儼長狄之來魯郊非族類其奈何是以絕
念戎荒甘心謝庭藉玉樹以長棲顧瑤草而怡情啜三
危之澄漿飲九光之秀莖願得臣弇州之大鳥相與誦

聖瑞於千齡

赤鸚鵡賦

宋謝莊

徒觀其柔儀所踐蘋藻所挺華景夕映容光晦鮮惠性
昭和天機自曉審國音於寰中達方聲於裔表及其雲
移霞峙霰委雪翻陸離暈漸容裔鴻軒躍林飛岫煥若
輕電溢烟門集場棲圃煜若天桃被玉園至於氣淳體
浮霧下崖沈月圖光於綠水雲寫影於青林逝還風而
聳翮霑清露而調音

紅鸚鵡賦

有序

宋
梅堯臣

相國彭城公尹洛之二年客有獻紅鸚鵡籠之甚固復以重環繫其足遂感而賦云

蹄而毛翼而羽以形以色別類而聚或嘯或呼遠人而處在鳥能言有曰鸚鵡產乎西隴之層巒巢於喬木之危端其性慧其貌安與禽獸異為籠檻觀吾謂此鳥曾不若斥鷃之翻翻復有異於是者故得以粗論吾昔窺爾族喙丹而綠今覽爾軀體具而朱何天生爾之乖邪

俾爾為爾類尚或弗取况爾殊爾眾不其甚與何者徒
欲謹其守固其樞加以堅鑲置以深廬雖使飲瓊乳啄
雕胡以充飢渴鑄南金飾明珠以為關閉又奚得於鳥
鳶之與雞雛吾是知異不如常慧不如愚已乎已乎

紅鸚鵡賦

有序

宋 歐陽脩

聖俞作紅鸚鵡賦以謂禽鳥之性宜適於山林今茲鸚
徒事言語文章以招累見囚樊中曾烏鳶雞雛之不若
也謝公學士復多鸚之才故能去昆夷之賤有金闥玉

堂之安飲泉啄實自足為樂作賦以反之夫適物理窮
天真則聖俞之說勝負才賢以取貴於世而能自將所
適皆安不知籠檻之於山林則謝公之說勝某始得二
賦讀之釋然知世之賢愚出處各有理也然猶疑夫茲
禽之腹中或有未盡者因拾二賦之餘棄也以代鸚鵡畢
其說

后皇之載兮殊方異類肖翹蠢息兮厥生成遂鎔埏賦
予予有物司之泊然後化兮默運其機陶形播氣兮小

大取足紛不可狀兮千名萬族異物珍怪兮託產遐陬
來海裔兮貴中州邈丹山於荒極越鳳皇之所宅稟南
山之正氣孕赤精於火德蓋以氣而召類兮故感生而
同域播為我形特殊其質不綠以文而丹其色物既賤
多而貴少兮世亦安常而駭異豈負美以有求兮適遭
時之我貴客方黜我以文采弔我於籠樊謂夫飛鳴而
飲啄不若雞鶩與烏鳶噫不知物有貴賤殊乎所得天
初造我甚難而嗇千毛億羽曾無其一忽然成形可異

而珍慧言美質俾貴於人籠軒寶翫翔集安馴彼衆禽
之擾擾兮蓋迹殊而趨乖既心昏而質陋兮乃自穢而
安卑樂以鐘鼓宜其眩悲蓋貴我之異稟何槩我於羣
飛若夫生以才天養以性違客之所悼我亦悼之我視
乎世猶有甚兮郊犧牢豕龜文象齒蚌蛤之胎犛牛之
尾既殘厥形又奪其生是猶天為非以自營人又不然
謂為最靈淳和質靜本湛而寧不守爾初自為巧智鑿
竅泄和漓淳雜偽衣羔染夏強華其體鞭扑走趨自相

械繫天不汝文而自文之天不汝勞而自勞之役聰與
明反為物使用精既多速老招累侵生鬻性豈毛之罪
又聞古初人禽雜處機萌乃心物則遁去深兮則網高
兮則弋為之職誰而反予是責

紅鸚鵡賦

明
張拱機

若夫雀應朱明鶉躔火德赤霄吐瑞丹穴多姿乃有巧
慧工言紺紅負彩兩臉俱動四趾齊分乾皋載彼淮南
鸚狀記於埤雅置中雪女持齋大士之旁使者綠衣錫

號玄宗之世洲草傳諸鼓吏舫題創自西京禿襟小袖
秦宮調帳底之笙響板琵琶蔡相感新州之夢玩供耳
目命制樊籠要昏質鬱芳蘋汁浣柳神翠剪間亦體鍾
皓璧淡勻梨面珠胎乃若象賁離明身膺赤蒂彤文有
炳茜翮于飛調弄箏簧朱孔陽而載毳翩翻錦繡丹如
渥以尤鮮全披鶴頂之文宛啜鶻魂之血斯則涎尾烘
晴繁纓絢罽羞伍提壺布穀能諧正始之聲代盡閨紫
妖黃獨尚純駢之產豈謂多言數窮被諸赭以惡其佞

抑亦麗人多豔襲之繒以富其妝譯通秦吉服炫竊丹
翻妙頻伽衿雄吐綬枕畔假北朝之寐應占翼折雙冠
枝頭問上皇之安祇見叢中一點價敵火齊偏教解語
衫輕浣布雅擅知音蓼灘楓葉經遶匝以顏分霞爛虹
蒸入迴翔兮色亂較書淚染桃箋猶記巧偷古本工部
啄殘稻粒便堪踢倒洲名憐其夙慧特賜緋衣寵以修
齡合封絳縣爾其轉喉顧影振味掠翎初來蠻語調笑
郝隆漸習華咻置同莊嶽於是覲睨失媚格磔慚喧鶴

咳既死燕喃弱年閉歲蕤於金鎖唾珠玉於錦箋班響
屨於幽幕伴鐵馬於前檐或喚妾以拾搔頭或勸郎而
將進酒自叙隴西家世間通梵本心經妒殺榴花恥來
赤鳳曾奪胭脂之山見色斯舉倘集珊瑚之樹聞語方
知此韋皋之石墻色澤不輝而麻客之雕籃威儀遜燦
者也至於紅奩繾綣紅袖裊裊紅線穿情紅綃織恨鳳
仙浸甲戲拋豆打相思猩醉拖裙膏膩脣香度哺天籟
笑啼態應朱衣之點人教歌舞照宜銀燭之燒謂宜開

籠放去解縹緲歸使之頡頏王神還山止茂糅漏砂以
扶顏隱招松赤領霞城而刷翅熟薦櫻朱不然則排玉
戶颺金鋪催妝梳洗棲溫樹之菁葱報曉妃娥食上林
之品料隨鵝遊太液之波流題頰葉學鴉帶昭陽之影
閃映朱甍再紀神雀之年會續南平之貢

御定歷代賦彙卷一百三十

謹案卷一百三十第十三頁前四行若乃少昊司
辰刊本辰訛晨據文選改

第二十頁後二行向瑤鏡而知歸按唐文粹瑤作
寶



總校官庶吉士臣張能照
校對官編修臣莫瞻菴
騰錄監生臣曹 泓

欽定四庫全書薈要

集部

御定歷代賦彙卷二百三十一

詳校官候補通政司經歷臣郭祚熾



御定歷代賦彙卷一百三十一

鳥獸

鶯賦

有序

魏文帝

鶯賦

前有籠鶯晨夜哀鳴悽若有懷憐而賦之曰

怨羅人之我困痛密網而在身顧窮悲而無告知時命
之將況升華堂而進御奉明后之威神唯今日之僥倖
得去死而就生託幽籠以棲息厲清風而哀鳴

鶯賦

魏

王粲

覽堂隅之籠鳥獨高懸而背時雖物微而命輕心悽愴
而愍之日奄藹以西邁忽逍遙而既冥就隅角而斂翼
眷獨宿而宛頸伺長夜以向晨聞倉庚之羣鳴春鳩翔
於南薨戴鶯集乎東榮既同時而異憂實感類而傷情

曉鶯賦

以芳天曉景悅
聽清音為韻

宋

田錫

煙樹蒼蒼春深景芳聽黃鸝之巧語帶殘月之餘光金
袂菊衣新整乎遷喬羽翼歌喉辯舌鬪成乎一片宮商

嘗以清漢云斜東方欲曉華堂靜兮寂寂珠箔深兮悄
悄新聲可畫初歷落於花間餘嘒彌清旋間關於樹杪
宛轉堪聽纏絲有情伊寶柱之清瑟與銀簧之暖笙誰
用交奏而成豔聲未若我朧月澹煙之際鶯舌輕清聽
者躊躇聞之怡悅若清露之玉珮觸仙衣之寶玦隨步
諧音成文中節未若我曉花曙柳之間鶯聲清切美夫
藻井霞鮮金盤露圓語因繁兮作默韻將絕兮重連牕
背紅燭星稀碧天楚襄王春夢覺來還應默爾陳皇后

香魂斷處寧不依然有時楊柳迴塘梧桐深井聲煙裊
兮忽斷意春牽兮自永新篁宿寒芳店朝景關關枝上
帶花露之清香喋喋風傳入月簾之靜影樓閣輕陰房
廊悄深引萬重之芳意成百態之餘吟綠牕夢斷玉鑪
殘堪憐俊韻寶帳酒醒清漏淺彌稱清音余以為春帝
之命敷宣詞令鄙桃李之無言嫌百舌之多佞知仙翰
兮善歌可司花於香徑巧緒非一詞端靡定其聲也累
累然端若貫珠悅春朝之采聽

聞鶯賦

元劉詵

惟太初之賦物兮何萬類之殊能草與木之多態兮固塊然而無情鱗與介之擾擾兮或有情而無聲蛙蚓濁而強聒兮蛩蜩咽而悲鳴雀喧夫朝日之暎兮猿哀夫晨霜之清夫固有厭而棄去兮亦有感而難為聽咸機籟之不能自已兮孰能槩之以悅心求衆聲之最和兮竊獨喜夫倉庚於時夏日逾永楊蔭彌堤山園暖潤堪熟麥齊樂天宇之肇霽雜野雉而羣飛長廊綠戶疎簾

四垂方書倦而進茶乃據几而拄頤忽有聲之喑喑復
縣縣而若隨感流轉之如園使予衷之倏怡於是思求
友於周雅懷好音於衛詩顧謂童子曰汝豈識之邪其
喜而揚者宴賓之鼓簧也其濶而清者升仙之吹笙也
其紆徐而有餘者魏工之歌纍珠也其足樂夫人之情
者韓娥之回曼聲也凡厥有生罔役於氣茲豈離於羽
族獨其聲之迥異豈中心之有加故語言之清粹將前
身之麟鳳長無憾於天地幸及時而為聲資吾儕之諫

戲固前修之可憐終見貸於俎味諒翱翔於山林誠焉
識於淪棄作斯文以為賞庶足表於儔類

鶯囀皇州賦

明太祖

惟淑鳥之神氣正三月以應期乘造化以嬌吟暢流金
於柳堤飲花露以香吻食飛絮以精奇棲碧梧兮侶鳳
凰翅翱翔兮與鵬齊浮林梢而色炫日弄翩翻而罕稀
樂鍾山之柱霄漢美巖谷以神怡爾乃笙簧嫩舌同律
呂以諧宜百花叢裏任意芳菲有時假天風而流翅俄

又斂翼以林枝效織梭而自在亦彷彿以星移若抖擻
以搏風疑大火之西馳今也節近清和薰風將施養羞
於森林深處翫綠陰而高低感大化之循環快靈禽之
足思

倉庚賦

有序

明
陳子龍

首夏鮮事偃息長林爰有倉庚飛鳴不止予感其文彩
聲音有自然之美而不為羅弋所慕又能應時潛藏類
有智者遂為賦之

當仲呂之嘉月實純和之令時倚榮木而翫志覩文禽
之羽儀錫商庚之雋目稟中央之麗姿應餘春以表節
鼓惠風而爰嬉穿繁林而弄影振高柯而訴心吮纖澤
以總翠翼燿燦而輝金既繽翻於煙幕俄宛轉於花陰
擬流黃之綴錦似華星之耀林挂危巢於青桂含熟果
於朱櫻飲霄瀝之夕墜臨霞氣之晨清入芳條而遍啄
繞綺閣而時鳴洵靈羽之婉孌庶神聽之和平爾其景
暉麗天輕颺拂路萍漲曲池花明密樹葉沃若以凝膏

草芊絲而氾露則有嚶嚶競諧交交遠驚繁聲瑣散清
音迴互態極紆妍情深馳慕爛熳參差飄揚布護擲傾
枝以自憐送緒風而引趣促妙奏於翠幃選嬌歌而暗
度若乃溼雲暮起零雨晝聯冥冥叢篠漠漠平田佇高
簷以愁溜眺脩樾而迷煙思珍偶之遠隔懷故枝而未
還既悽咽以激楚又縹緲而便娟或曼響而含變或微
哢而屢遷轉濃陰之奧扉啼空谷之潺湲是以若歡若
怨非徵非商雜杳靡曼朗徹悠揚媚清淑之昌景扇和

陶之盛芳悲士倚杖而不去蠶妾攜筐而內傷莫不覲
色徘徊應節徬徨感玄造之誕物胡織翼之鮮燦紀月
令於豔陽助周南之泮渙味不充於鼎俎材匪供於服
玩本感時而暢音亦羣飛而無憚及乎青女司令玄英
屆期沙飛大漠葉隕寒涯晚日隱靄朝冰滿枝則熠燿
闕跡覲皖斂輝與春燕而同蟄背霜鴈而相違類君子
之語默識翔集於希微

反舌賦

梁沈約

咨玄造之大德播含靈於無小有反舌之微禽亦班名
於庶鳥之嘉容之可翫因繁聲以自表其聲也驚詭囀
嚼縈紆離亂駢浮迴合巖危瑣散或發曲無漸或收音
去半既含意於將曉亦流妍於始旦雜沓逶迤噉咩參
差攢嬌動葉促轉縈枝分宮析徵萬矩千規因風起呀
曳響生奇對芳辰於此月屬今余之遵暮勸城守之誼
疲愛田郊之間素卷春物而懷之聞好音於庭樹

反舌賦

梁蕭子暉

彼陶嘉之盛月氣依遲於池沼春霏霏之花落愛翹翹
之令鳥無榮辰之可因弄樞機而自表爾其聲也嘹唳
胃結鬱抑縈咽繁音瑣碎衆響攢熾或急轉赴機或緩
引趨節或洪纖共起或長短俱折意疑續而更斷謂當
舉而忽垂聲憑林而逾厲響因風而益危

反舌無聲賦

以氣感聲盡取
以候時為韻

唐張仲素

彼衆禽兮終歲嚶嚶此反舌兮語默有程蓋時止而則
止故能鳴而不鳴青春始分則關關而爰語朱夏將半

乃寂寂而無聲有以見天地之候有以知禽鳥之情爾
乃觀其所來察其所以或羣或友爰飛爰止啄朱櫻而
潛下嫋綠楊而暗起先秋而默恥競響於蜩螗擇木而
遊契不言於桃李於是靜觀其妙先徵其比閱茲百轉
誠煩詞於躁人默若三緘象欲訥於君子徒觀其行藏
以時喧靜惟允其鳴也有節其默也可準初疑管絃之
並奏鏗爾曲終又似環珮之齊鳴詘然聲盡是以理契
中寂道符閑澹陰陽交而止聲春夏交而知感哂城烏

之夜噪向曙仍啼歎野鶴之秋鳴在陰常慘原夫生乃
依巢來而作候靜集林薄閑棲苑囿飛而無懼知皇家
仁解網羅應不愆期荅聖君信及鳥獸懿夫過其音調
其羽結舌何異消聲何取鶯能嘒鸞善舞鳳鏘鏘而聲
樂鴈嗷嗷而音苦在和鳴而則多於敬授而何補曷若
動適其宜靜得其時伴玄燕之辭巢秋而俱去陪黃鳥
之遷木春以為期豈比夫嘻嘻者聞妖於亳社交交者
見刺於秦詩斯則冥契陰隲迴殊品彙標羽族以稱奇

載月令而為貴配鳴鳩之拂羽備歲候於三百六旬比
鷓鴣之吞聲應天時於二十四氣至矣哉隨時之智從
宜之義抑斯禽之謂

山雞賦

晉傅玄

惟南州之令鳥兼坤離而體珍被黃中之正色敷文象
以飾身翳景山之竹林超遊集乎水濱鑿中流以顧影
睇雲表之清塵

錦雞賦

有序

明王世貞

鄖山中多錦雞五色可愛古不經見至明定為二品服章人始稱之按爾雅紀雉有數種曰鷲者似山雞而小冠背毛黃腹赤項綠色鮮明疑即此物也又尚書山龍華蟲注華蟲雉也一云鷲雉也當時服章所取意或由此初夏畫永感其在目聊為賦之

有鳥於此鼻祖鷲鷲厥彩五章實繁其族玉衡之散其造不淑棲於埒桀人所卵育爰有令支機精所屬首若鬱金項如結綠蜚翠叢腋渥丹凝腹忽橫絕而迅往杳

驚電之掣目稍安翔而反顧爍殘霞之散陸爛爛兮芍
藥之春敷灼灼兮菡萏之朝榮又似乎火齊之為鎗兮
蜀機軋軋而未停爾其耿介自標馴和且平棲止必諧
飲啄不爭能使鶡慚粗猛雉遜文明雖彬彬乎君子實
粥粥其無能之曾城之善舞謝九真之長鳴然而么磨
微質托產遐裔豈帝舜之華蟲而旁采乎余類彼譽命
兮不逮乎先朝乃服采兮彰施於聖世陋吉光之徒珍
笑鷓鴣之非麗躡孔翠而直上托胎禽以差次聊頡頏

兮筍班竟先登兮楓陛噫嘻譬之雲臺丹青而赤松托
寄者邪上應天象而垂釣水涖者邪名之曰錦雞而古
無是者邪其鶴鬪為兄以鸚為弟者邪亂曰喑喋禾黍
聊容裔兮不自知賤安知貴兮食子之食匪以惠兮所
苦籠繫願從此逝兮

鴛鴦賦

梁簡文帝

朝飛綠岸夕歸丹嶼顧落日而俱吟追清風而雙舉時
排荇蒂乍拂菱花始臨涯而作影遂盛水而生花亦有

佳麗自如神宜羞宜笑復宜嘖既是金閨新入寵復是
蘭房得意人見茲禽之棲宿想君意之相親

鴛鴦賦

梁元帝

青田之鶴晝夜俱飛日南之鴈從來共歸雙飛兮不息
自憐兮何極一別兮經年相去兮幾千雄飛入玄兔雌
去往朱鳶豈如鴛鴦相逐俱棲俱宿勝林鳥之同心邁
池魚之比目朝浮兮浪花夜集兮江沙萍隨流而傳岸
網因風而綴花見虹梁之春色復相鳴而戢翼蘭渚兮

相依同盛兮同衰魂上相思之樹文生新市之機金雞
玉鵲不成羣紫鶴紅雉一生分願學鴛鴦鳥連翩恒逐
君

鴛鴦賦

陳
徐陵

飛飛兮海濱去去兮迎春炎皇之季女織素之佳人未
若宋玉之小史含情而死憶少婦之生離恨新婚之無
子既交頸於千年亦相隨於萬里山雞映水那自得孤
鸞照鏡不成雙天下真成長合會無勝比翼兩鴛鴦觀

其哢吭浮沈輕軀澆潏拂荇戲而波散排荷翻而水落
特訝鴛鴦鳥長情真可念許處勝人多何時肯相厭聞
道鴛鴦一鳥名教人如有逐春情不見臨邛卓家女祇
為琴中作許聲

鴛鴦賦

周庾信

虞姬少來事魏王自有歌聲足繞梁何曾織錦未肯挑
桑終歸薄命若罷空床見鴛鴦之相樂還敲眼而淚落
南陽漬粉不復看京兆新眉遂嬾約况復雙心並翼馴

狎池籠浮波弄影刷羽乘風共飛簷瓦全開魏宮俱棲
梓樹堪是韓馮若乃韓壽欲婚溫嶠願婦玉臺不送胡
香未有必見此之雙飛覺空牀之難守

鳩鵲賦

晉 摯 虞

有南州之奇鳥諒殊美而可嘉生九皋之曠澤遊江淮
之洪波既翦翼以就養遂婉孌乎邦家鳩鵲呈儀若刻
若畫鸞頸龜背戴玄珥白斑毛頰膺駁羽朱腋青不專
紺纁不擅赤因宛點注希稠有適其在水也則巧態多

姿調節柔骨一低一昂乍浮乍沒或遊或舞續醜倏忽
若乃陽故多陰殊方相求見水則喜睹火而憂

鸚鵡賦

梁簡文帝

飲三芝之淳露食六草之英芳似金沙之符米同錦質
之報章紅毛覆臆翠鬣垂心浴波沫渚浮廣戲深臨高
舞翮映淺弄音逐餘暉而顧景乘清吹而微唵

鸚鵡賦

宋謝惠連

覽水禽之萬類信莫麗乎鸚鵡服昭晰之鮮姿糝玄黃

之美色命儔侶以翱遊憩川渚而偃息超神王以自得
不意虞人之在側網羅幕而雲布摧羽翮於翩翩乖沈
浮之諧豫宛羈畜於籠樊

鷺鷥賦

有序

晉張望

余觀鷺鷥之為鳥也形貌叢茂尾翮憔悴樂水以遊隨
波淪躍汎然任性而無患也

惟鷺鷥之小鳥託川湖以繁育翮舒翮以和鳴匪窘惕
於籠畜澆滯池沼容與河洲翔而不淹集而不留值汗

則止遇澤則遊淪潭裏以銜魚躍浪表而相求萃不擇
渠娛不擇川隨風騰起與濤回旋沉窺則足撥圓波浮
泳則臆排微連率性命以閑放獨遨逸而獲全

翡翠賦

梁江淹

彼二鳥之奇麗生金洲與炎山映銅陵之素氣濯碧磴
之紅泉石錦質而入海雲綺色而出天峯岑巖而蔽日
樹靜暝而臨泉霞輕重而成彩煙尺寸而作緒熱風翕
而起濤丹氣赫而為暑對滂流之蛟龍衝汶漻之霧雨

耀綠葉於冬岫鏡朱華於寒渚斂惠性及馴心騫頰翼

與青羽終絕命於虞人充南琛於祕府備寶帳之光儀

登美女之麗飾雜白玉以成文糝紫金而為色專妙綵

於五都擅精華於八極傳貴質於竹素晦深聲於百億

嗟乎雞鶩以稻粱致憂燕雀以堂構貽愁既銜利之已

近又遁害之無由今乃依赧火之絕垠出赤縣之絃州

遠人迹而獨立擎天倪而為儔竟同獲於河鴈不俱怨

於海鷗必性命兮有當孰能合兮可求

狎鷗賦

以釋意與遊遠之汀曲為韻

唐黃滔

海童以泛泛浮浮愛於白鷗遂將窮於賞翫乃相狎以
遨遊彼鳥何知苟同心而同德斯人足驗諒不忤而不
求當其訪物外之高蹤得沙間之逸致雲心瀟灑以薦
往鶴貌飄飄而疊至列為儔侶肯無求友之聲卻盡猜
嫌皆得忘形之意至若海鏡秋碧天藍霽青磨開桂月
於浩渺畫出蓬山於杳冥爾乃瞻雪影緬風翎曲得其
情此曠蕩而來依別派不言而信彼聯翩而飛下迴汀

四目夷猶兩情容與曾無隼擊之患忘到鳩居之所羅
列靡慚於交契固類朋遊參差罔愧於弟兄還同鴈序
斯則別號羽客參為水仙楊柳之江頭雨夜蒹葭之渡
口霜天莫不探此景象窮乎歲年異雞羣之迴處殊鶯
谷之高遷掃塵緒以皆空那虞觸網負身弓而不縮詎
肯驚弦則知蟬蛻是非羽翔凡俗豈鷹揚於霄漢之外
乃鷄立於煙濤之曲因嗤鴻渚蓋春去以秋來翻笑鵲
河竟離長而會促其父既駭於斯爰令執之纜及入籠

之念已興登俎之疑潮滿滄洲游泳空期於水際日生
丹壑翱翔遽在於雲渚所謂禍機中藏物情外釋且斯
鳥之猶爾豈於人而能隔則包含詭給之流宜覽之而
改易

白鷗賦 有序

唐 蕭穎士

白鷗羽族之幽奇素質黑章爪喙純丹體備冠距頗類
夫雞翟神貌清閑不雜衆禽棲止遐深與人境罕接固
莫得而馴狎也上聞而徵焉處以雕籠致以驛遽是將

集長楊游太液行有日矣天寶辛卯予飄泊江介流宕
踰時秋八月自山陰前次東陽方議夫南登西泛極聞
見之義諒褊懷所素蓄而未之從也會有命自天召赴
京闕適與茲鳥偕至於會稽傳舍觀其宛頸旁睨迴惶
掩抑往往孤鳴音韻淒涼如慕侶而不獲因感而賦之

曰

鳥之生矣于彼南山彩必玄素文不綺斑備文武之正
飾懋妖姬之殊顏情莽眇以耿潔貌軒昂以安閑無馴

擾之近性故不愜於人寰遊必海裔棲必雲間曾養拙
以自保祛未萌之憂患不然豈陋彼都邑之佳麗顧投
身乎阻艱以其標自然之靜故名之曰白鵬者歟何天
聽之緬邈辱微禽之瑣細偶一日之見羈委微軀以受
制望層城以斂翼懷衆侶而孤唳從廢置之駿奔仰君
門以遐逝君門兮九重洞杳窳兮穹崇池太液兮島方
壺萬族翔泳乎其中晝聒未央之繁絃夕驚長樂之虛
鐘顧疎野之賤迹豈敢求一枝而見容越水清兮鏡色

吳山遠兮天逼窺淺深以飄影逗清冥兮一息謂杉松
可得永日而噪聚萼荇足以窮年而啜食一與心賞兮
睽違念歸飛兮何極鸚能言而入座鶴善舞而登軒殊
二者之常態諒慙惶於主恩是以雖信美而非其志獨
屏營而競魂者焉

鳩賦有序

晉阮籍

嘉平中得兩鳩子常食以黍稷後卒為狗所殺故為作
賦

伊嘉平之茂惠洪肇恍忽以發蒙有期緣之奇鳥以鳴
鳩之攸同翔彫木以胎偶寄增巢於喬松喻雲霧以消
息遊朝陽以相從曠踰旬而育類嘉七子之修容始戢
翼而樹羽遭金風之蕭瑟既顛覆而靡救又振落而莫
弼陵桓山以徘徊臨舊鄉而思入揚哀鳴以相送悲一
往而不集終飄搖以流離傷弱子之悼栗何依恃以育
養賴兄弟之親戚背草萊以求仁託君子之靜室甘黍
稷之芳饍安戶牖之無疾潔文襟以交頸抗華麗之豔

溢端妍姿以鑿飾好威儀之如一聊俛仰以逍遙求愛
媚於今日何飛翔之羨慕願投報而志畢值狂犬之暴
怒加楚害於微軀欲殘沒以糜滅遂捐棄而淪胥嗟薄
賤之可悼豈有忘於須臾

斑鳩賦 有序

晉傅咸

庭楸蔚然成林閒居無為有時遊之顧見斑鳩音聲可
悅於是捕而畜之既以馴擾出之於籠無何失去後時
時一來飛翔殆如有戀聊為之賦

集茂樹之蔭蔚登弱林以容與體郁郁以敷文音邕邕
而有序情欽樂而是悅遂籠之於前宇爾乃飲以神泉
食之稻梁朝憩椒塗夕宿蘭房時連翩於庭阿見飛燕
之頡頏慨感物而哀鳴聲楚切以懷傷仰華林而矯翼
紛翻逝而高翔

鵙鳩賦

宋梅堯臣

時人謂鵙鳩癡拙禽也茲禽雖癡且拙猶能以喙寫心
布於辨音者焉曰我智不如燕鴈識氣候之蚤晚隨陽

而來知社而返勇不如鷓鴣鷹鷂恣搏擊於秋天下無
全物落不空拳慧不如鸚鵡鸚鵒入崇堂兮蔭夏屋事
言語以如人餌果梁而飫腹巧不如女匠挂巢宇於枝
上畏風雨之漂搖紮茅莠而密壯年不如鶴鶴潔羽毛
於寥廓希霖雨而鳴垤和氣類而靡節茲五者實無有
於羣鳥分馴馴於林表癡亦誠多拙亦不少雖不能趨
暄燠之時亦毛翮而自持雖不能決爪吻之利亦飲啄
而自遂雖不能弄喉舌之辯亦呼鳴而自善雖不能理

窠巢之完亦棲處而自安雖不能適變赴情亦隨宜而
自寧噫唯癡與拙天之所生若此而已矣又烏足為之
重輕

義鴿賦有序

明 皇甫汈

余客居陪京常養鴿十餘尋被流言將圖歸計乃命童
子悉放之一鴿夜去晨來徘徊瞻顧意若戀戀因感而
作賦焉詞曰

何斯禽之靈哲兮乃戀主而踟躕若含意兮未展猶弔

影以相於遠空梁以託宿兮既故棲之在除方其馴擾
晨軒和鳴夕砌飲啄閒暇毛羽鮮麗或命侶以將雛奉
清光以娛稚顧以鳥而養鳥胡觀仁而取義逮其主人
不樂羣鴿已辭翼將翔而復止聲暫背而仍依豈無匹
而守獨舍寥廓而安卑似楚姬之怨別類田客之相隨
痛難驚之騫舞兮俾鸞鳳為之摧頽乏冥鴻之遐舉兮
悼鸚鵡之罹災衆方嫉余之修能兮鳥何意而憐才若
夫雀處堂而孔懼兮鵬止舍而賈悲繫鴿非野鳥兮奚

昭慝而示危又若海鷗不驚庭爵斯集愧未盡乎塵機
亦何徵於報德若其張仲之盧乍偃翟公之門尚開朱
生絕謁以謝往敬通却掃而杜來世之喪道人亦何心
昔時結駟今日遺簪請息交於良友恐負誚於微禽

讀鴿賦有序

明侯一元

司勳皇甫大夫舍中馴鴿十餘既被言欲行則放鴿於
野鴿有去而復還者大夫感之作鴿賦讀之悽愴決絕
余以大夫往忤中貴承譴江湘既狎於憂患且君子焉

往而不三黜將廣大夫之意故復賦焉

何浮雲之黯黯兮哲人罹其菁災歛乘沐而往唁兮遵
庭除而徘徊覩遺鷓於坐隅兮羌欲飛而未忍流惠音
以盈庭兮情鬱結而紆軫感夫君之昌辭兮怡臨軒而
太息張羅闌其在門兮夫何斯禽之獨見暱無稻粱以
與汝兮故棲溘焉不存鵬鳥告余以將去兮雄鳩鳴而
翩翻尋深林以出雉兮弋高天而下鳶覽機辟之恢恢
兮孰羽族之能安禽將犧而斷尾兮獸將繫而決蹠之

彼鶴之惠姿兮孰云屈乎華軒奠東門之食飲兮發賈
生之休問羌聆音而鼓翼兮俛抽思而若愠何主人之
夙知兮猶感激乎茲詞歷險難而密若兮顧微禽而怛
之扼怒虎之魚然兮曾不忍乎虵之啣膚登太行而不
慄兮迺彷徨乎陂陲昔機槍之干紀兮第揚光於帝側
執法昭而相睨兮勾陳弗求其賊君乃挺夫剗墓之鈎
刃兮儼植立於中流終被椒蘭之嗟佞兮亦浮湘而遠
投猘猱之牙森其相向兮世共嗟其濩落陷危亡而不

反顧兮豈復怯夫好爵悲荆棘之既芟兮芳蕪蔓而不
揚鴛既違夫鷓鴣兮百鳥喧啾而踉蹌彼螳螂之執葉
兮黃雀睨而在後閱傳舍之流人兮孰棲遲而能久循
疇昔之顧養兮儔輩响其相鳴倏澶漫於中野兮渺不
知其所征慨衰榮兮各一時子特立兮有所思江未春
而鴈北社下秋而燕辭釋山中之隱禍兮遠幕上之至
危智寧二虫之不若兮固義結而不可離隘廷尉之題
門兮晰馮公之過市鳥獸不可與同羣兮余非襲人而

焉處昔靈均之遐征兮睨故都而躊躇顧微羽其猶若
茲兮又焉詫乎吾累亂曰嫵娟飛柳故所息兮確確自
潔物無慝兮儔侶既遠形影隻兮夷猶躑躅感今昔兮
永葆孤貞矢無極兮

馴鴿賦

明

王世貞

惟中國之珍禽有茲羽之殊質貌皦皦而自分性溫然
其如一秋則籬菊並麗於潯陽春則木藥均華於洛室
指未易屈譜不能悉爾乃玉甯朱眸危冠卑趾或冰質

而彩其雙翅或雪毛而黔其首尾或若漢繡之就機或
若商彝之出水山鵲莫調家雉無文爾獨馴狎雲錦成
羣饑而兒女之昵昵飽矣童稚之欣欣方緝心以委質
忽聳身而入雲舒徐兮停霞之碎剪燦疾兮奔星之疊
發忽天樂之錯鈿知傳鈴於尻末始順風而揚聲奈迴
飈之錯節若夫昂首聳肩周旋中規婉態柔音逐雄媚
雌無別差慚乎匹鴛惱淫少愧乎關雎然而知足知止
毋乃天機當抱卵之縣縣若返聽乎玄府憐弱雛之艱

食更嘔哺而不辭苦感主人之微祿日徬徨兮未忍去
嗟德曜之肥醜恐終罹乎鼎俎彼夫好水之敗以為爾
罪端陽之射與器俱碎霜風冽野鷹隼方厲托慈蔭於
佛日指招提而趨避曷若狂夫衽鐵思歸流黃遼陽一
信為致君傍辭曰浴中黃耳為日長上林鴈素竟茫茫
不辭天衢遠銜恩酬稻粱

御定歷代賦彙卷一百三十一

御定歷代賦彙卷一百三十二

鳥獸

鵬賦

唐
杜 甫

當九秋之淒清見一鶚之直上以雄材為已任橫殺氣
而獨往梢梢勁翻肅肅遺響杳不可追俊無留賞彼何
鄉之性命碎今日之指掌伊鷖鳥之累百敢同年而爭
長此鵬之大略也若乃虞人之所得也必以氣凜玄冥

陰乘甲子河海蕩滴風雲亂起雪冱山陰冰纏樹死迷
向背於八極絕飛走於萬里朝無以充腸夕違其所止
頗愁呼而蹭蹬信求食而依倚用此時而楛杙待弋者
而網紀表狎羽而潛窺順雄姿之所擬歛捷來於森木
固先繫於利觜解騰攫而竦神開網羅而有喜獻禽之
課數備而已及乎閩隸受之也則擇其清質列在周垣
揮拘孿之掣曳挫豪梗之飛翻識咬遊之所使登馬上
而孤騫然後綴以殊飾呈於至尊搏風槍槩用壯旌門

乘輿或幸別館獵平原寒蕪空闊霜仗喧繁觀其夾翠
華而上下卷毛血之崩奔隨意氣而電落引塵沙而晝
昏豁堵牆之榮觀棄功效而不論斯亦足重也至如千
年孽狐三窟狡兔恃古塚之荆棘飽荒城之霜露迴惑
我往來趨趨我場圃雖有青骹戴角白鼻如瓠感奔蹄
而俯臨飛迅翼以遐寓而料全於果見迫寧遽屢攬之
而穎脫便有若於神助是以嘒嘒其音颯爽其慮續下
而躡而繚繞尚投跡而容與奮威逐北施巧無據方蹉跎

而就擒亦造次而難去一奇卒獲百勝昭著夙昔多端
蕭條何處斯又足稱也爾其鷓鴣鴉鷂之倫莫益於物
空生此身聯拳拾穗長大如人肉多奚有味乃不珍輕
鷹隼而自若託鴻鵠而為鄰彼壯夫之慷慨假強敵而
逡巡拉先鳴之異者及將起而遙臻忽隔天路終辭水
濱寧掩羣而盡取且快意而驚新此又一時之俊也夫
其降精於金立骨如鐵目通於腦筋入於節架軒楹之
上純漆光芒掣棟梁之間寒風凜冽雖趾躄千變林嶺

萬穴擊叢薄之不開突杈柯而皆拆此又有觸邪之義也久而服勤是可吁畏必使烏攫之黨罷鈔盜而潛飛梟怪之羣想英靈而遽墜豈比夫虛陳其力叨竊其位等摩天而自安與槍榆而無事者矣故不見其用也則晨飛絕壑暮起長汀來雖自負去若無形置巢巖嶽養子青冥倏爾年歲茫然闕庭莫試鉤爪空迴斗星衆雛儻割鮮於金殿此鳥已將老於巖扃

一鶚賦

以凌厲清浮羽翰無比為韻

唐楊弘真

禽之鷲者鷲兮挺生不翻翻以羣萃自耿介以孤貞羽
族之中雖彼衆而我寡雲路之上如特立而獨行固將
殺敵無匹擊鮮莫京豈惟拂之於平野翫之於太清哉
卓彼雄姿凜乎壯觀或危石以礪吻或高柯而整翰搏
鳩之隼不敢飛揚逐燕之鷗望而伏竄及夫當殺節乘
勁秋雙眸電擊六翮雲浮仰之彌高方一舉而千里翔
而後集恥乘居而匹遊既而變金風驚商律不類聚以
頡頏自孤飛而厲疾介然直下固不可以同羣邈矣獨

翔諒有殊於喪匹摩碧落而上騰與紫氣而相凌自樂
其絕侶無求於得朋鷹揚者迎之而不逮鵬悍者攀之
而不能莽蒼天高悠揚日厲自暇自逸倏來倏去何剛
者而不懼何勃者而不制風毛雨血在嫉惡而不遺草
伏木棲咸畏威而若厲明心不測利用則殊以少為貴
匪繫有徒想像乎八紘之間視遠如邇隱映乎九霄之
際出有入無諒搏擊而不競豈蒐狩而弗圖是知禽之
凡者雖累百而何補士之傑者將無雙而必取亦猶務

利箭刷迅羽雖多亦奚以為固非一鷲之為伍

鷹賦有序

晉孫楚

郭延考與余厚其從者講二鷹以侍側郭邊人也好弋獵顧盼心欲自娛樂請余為賦曰

有金剛之俊鳥生井陘之巖阻超萬仞之崇嶺蔭青松以靜處體勁悍之自然振肅肅之輕羽擒狡兔於平原截鴻鴈於河渚且其為相也疏尾濶臆高髻禿顙深目蛾眉狀似愁胡曲背短頸足若雙枯麾則應機招則易

呼背碣石以西遊經馬嶺而南阻於時商秋既邁歲在
玄冥風霜激厲羽毛振驚爾乃策良驥服羔裘鞞青骹
戲田疇縈深谷繞山丘定心意審精眸獸馳厥足鳥矯
其翼下赴幽谿上翔辰極隨指授以騰踴因升降以畢
力紛連薄以櫻竄遂陷首以摧臆

鷹賦

晉傅玄

含炎離之猛氣兮受金剛之純精獨飛跼於林野兮復
徊翔於天庭左看若側右視如傾勁翮二六機連體輕

鈎爪懸芒足如枯荆背利吳戟目頰星明雄姿邈世逸
氣橫生

鷹賦

隋
魏彥深

唯茲禽之化育實鍾山之所生資金方之猛氣擅火德
之炎精何虞者之多端運橫羅以羈束綴輕絲於雙
眼結長皮於兩足飛不遂於本情食不充於所欲逸
翰由而暫斂雄心為之自局若乃貌非一種相乃多
途指重十字尾貴合盧立如植木望似愁胡背同劍
利脚等荆

枯亦有白如散花赤如點血大文若錦細斑似纈眼類
明珠毛猶霜雪身重若金爪剛如鐵或復頂平似削頭
圓如卵臆闊頸長筋麤脰短翅厚羽勁髀寬肉緩求之
羣羽俱為絕伴或似鶉頭或似鷄首赤睛黃足細骨小
肘懶而易驚姦而難誘住不可呼飛不及走若斯之輩
不如勿有若夫疾食速消此則有命兔頸猴立是為無
病廁門忌大結肚惡軟絛不宜絕背不宜喘生於窟者
則好伏巢於木者則常立雙散長者則起遲六翮短者

則飛急毛衣屢改厥色無常寅生酉就總號為黃二周
作鵝千日成蒼雖曰排虛性殊衆鳥雌則體大雄則形
小遇犬則驚猜得人則馴擾養雛則少病野羅則多巧
察之為易調之實難格必高迴屋必華寬蓋以取熱酒
以排寒鞫須溫暖肉不陳乾近之令狎靜之使安晝不
離手夜便火宿微加其毛少減其肉肌羸腸瘦心和性
熟念絕雲霄志在馳逐

白鷹賦

唐闕名

於爍明德兮動休徵紫墨綬兮效素鷹朱草如之何所
紫則止玉壺如之何所飲則承借如紫巖碧流煙深樹
幽產鷺成羽自春徂秋含陰陽之淳粹任天地之剛柔
懷好音與好質非成色而不求厭羽毛於原野戀主人
而即留嗟乎含情履潔象君之節厲吻鈎銳澡毛玉截
遷河陽之喬木一點清花映武城之瑤琴孤飛春雪昔
王魯同勲賢哉二君或雉隨黃壤或鷺下青雲莫非白
鷹之為最况復見之與所聞良以出自幽谷遷於華屋

霜飄上衣星流入目涅而不緇惟公象之比德於玉象
公不欲匪我政表來儀者何致之由德玩物則那思君
子以馴擾不避虞人之網羅蓋以少而取貴豈同乘鴈
之為多

蒼鷹賦

唐闕名

中靈繁毓萬象周流綜羣物之衆夥懿羽族之齊侔俱
含識與哺啄終愧容於爽鳩散以瑤光之彩來自鍾巖
之丘周官以司寇比德漢氏以將軍作儔鈎成利背電

轉奇眸蒼姿疊色玄距聯鞫至於長楊大獵雲夢時蒐
寒光送曉霜氣橫秋頓平原而亘弋截洞壑以張罟野
霧初霽朝陽尚早於是排空漢飛絕島奮之鼓之載擊
載討凌紫氣而蔽日下平皋而覆草歸鴻失四飛之路
狡免亡三窟之道夫品彙之功用之非器至於表德頗
亦千致仙莫過龍駿莫過驥鵬垂天以圖遠劔斷甲以
稱利夫其庶類之呈能未若茲禽之為鷙固得緗牒再
演史臣攸記逐彼鳥雀然明之對國僑擊於殿上要離

之讎慶忌且般樂之遊君子未適禽荒是戒哲王盛績
太康洛汭之表已驚不還李斯上蔡之門情何更弱覽
二君之喪道每觀事其如惕幸免射於高墉願搏風而
上擊

放籠鷹賦

以無育斯禽以明惡殺為韻

唐張 莒

貞元初敷文教於率土念畋遊之無度啓鷲鳥幽繫之
中示皇家不私之務將以致仁壽明好惡雕籠永閉念
受紕之多虞金架爰辭俾凌風而得路由是縱逸翰於

寥廓釋猛志於局固當其海宴時清天高日明離習習之恩重視蒼蒼而體輕捨靈檻而方銳歷秋林而上征乍遂翻空出君門而不返遙憐厲吻過宮樹而猶驚洎夫邨彼幽閒順茲棲止用成端拱之化將盡好生之理足使去羈上而無疑顧人間而何以昔因殊顧幸肉食以見羈今降深衷忽雲翔而有始故得脫身聖代矯跡天衢方縱心於萬里詎斂翼於四隅山藪之思俄失背距之衛寧無然則播仁風於垓北乃順時以止殺戒逸

氣於荒淫故無用於茲禽豈俟夫養育之勞既久徘徊
之懼彌深雖多士盈朝無聞諫獵故黔首在下盡得歡
心則知信及纖微念茲棲宿庶羣情而知感期衆類之
蒙福遂使擊搏之性將翔將翔乳哺之心既生既育是
用保其鴻業建此深規惠澤爰臨整羽儀於戶牖微誠
既展遂鳥雀於藩籬信九霄之可託將一舉而在斯

畜鷹賦

明 劉 球

惟鷹之為鳥有號曰鷩鳩鍾炎精以為武德稟金氣而

多伐謀習學則時乃夏祭鳥而天以秋威以時養翎以
日修非其類不與非其林不休此羽族之雄傑百鳥所
不得儔也是以有炳其文不一其色竦膺而昂脰博頸
而健翮尾以合盧為貴目若點漆之黑喙曲於首矛趾
利於鐵棘望遠兮若愁胡屹立兮若置石高舉則飄然
凌乎九重之雲霄下視則廓然見乎萬里之山川倏然
闖越忽然幽燕嶽靈不能障川后不能延其奮揚也有
尚父之勇其捕逐也有子產之賢其數飛也鬣鬣乎學

者之功其以小制大也兼總乎御史之權故百獸望之而跡斂衆禽觸之則軀捐豈其情之好殺蓋亦天使其然也一旦應明詔沽善價貯雕笈覆黃帕足紆碧絲之緙以為常首冠續韋之幘而少謝脫風霜於渤海之濱濡雨露於闕廷之下顧玩歎賞徘徊聖駕迺命鷹坊寧厰攸舍處之溫涼之室棲乎丹朱之架肥鮮飽於歲月食息時於晝夜幸遇比乘軒之鶴不殊親愛雖入懷之鷄莫跨使其才不絕倫則是寵也亦何繇而迓哉迨乎

閉蟄屆候冬狩及期萬乘雷動億騎雲隨則臂以金吾
之衛士乘以內廄之驍驩左右乎紫鸞之駕後先乎翠
鳳之旗入泱泱之野以較獵臨奔逐之時而脫羈是宜
竭所能鼓厥翅與西旅之焚薺力東海之豹合勢大搏
彼熊羆小獐此兔雉獻獲虞人奏功輿次以羞大庖以
實賓器以為乾豆祖廟是事思報效於萬一求以免乎
素餐之愧則於恩為不孤於德為不負苟饑則惟人是
依飽則高飛而遠去則雖有矯矯之翰善攫之距較名

而考實曾鳴鶚之不如若困阨而賴濟於人為臣而叨食於主蒙其施當懷其報可不鑒視於鷹乎

海青賦

金趙秉文

霜空蕭條塞草先白海樹無枝海雲寡色黯兮遼迴風
悲日匿何鷲鳥之不羣起翰海而一息爾其俊氣橫鶩
英姿傑立頂摩穹蒼翼迅東極鐵勾利背霜排勁翮角
膝挿腦細筋入骨顧盼雄毅飛騰滅沒旦寄巢於扶桑
夕刷羽於碣石於是乃命虞人朔風勢繳矰設萬里足

擎一枝心折遂投丘以委命恥摧翼以喪節奚奴頭千
髯官指百時飢飽以嗾呼謹寒溫之調適臂不暇弛鈴
不停掣猶恐懷林丘夢砂磧恨身繫而子留歎雄孤而
雌隻也逮其骨肉融性情習違龍沙入閭闔蒙禁嚮之
專寵叨錦鞬之前席思報功於所養甘賈勇於一決旣
而新春屆候大族司月陽燄浮冰漸拆水溶溶而泛淥
鷺翩翩而下唼探使星馳屬車雷發千輿隱嶙萬騎飄
瞥上將幸乎光春之中所以觀民風而宣鬱結龍旂標

而殿門敞虎旅圍而鼓聲疊忽水擊而驚飛乍雲翔而
成列玉爪翻臂錦條下繼初貼水而徐回倏干雲而上
擊雨血紛紜風毛磔裂象廣寒之舞紛霓裳之回雪似
吳宮之戰驚玉顏之喋血壯如破敵勢甚擒賊至如關
羽義勇張綱奮烈取鯨鯢於堅陣叱豺狼之當輟固亦
釋豐狐之九尾略狡兔之三穴蓋猶賞驥足之神駿且
以勸忠於英傑也既而壽杯舉臣工悅天威暢皇恩洽
背長楊兮而趨京闕

鶻賦

唐李邕

伊鷲鳥之雄毅有俊體之超特意凝緩而無營體間整
而自得陰沉其情慘淡其色固未足以異於衆禽也夫
一指一呼一擊一搏為主之用騁人之樂凜然神動翕
然氣作殞三窟之狡免斃五里之仙鶴騰霄漢而風捲
透原野而星落萬乘為之顧盼六軍為之揮霍歡聲動
於天地逸氣靄於林薄至若逐鳥舛類射隼殊名獲不
相讓遊不同征何至德而能制每協義而不爭偶坐推

食雙飛和鳴殺敵齊力登樓比形夫其巖冬沍寒烈風
迅激或上棘林或依危壁身既稟於喬木骨將斷於貞
石營全鳩以自暖罔害命以招益信終夜而懷仁仍詰
旦而見釋矧乃戀主不去徇食猶止豈貪利而永言將
效誠而必死甘閉於籠分從於使寧竭力之利人曷戢
翼以存已則知負力干勢爭啄奪食始飛聲而遠引忽
側翅而橫感遇之者天當之者覆壯士感之驚歎行子
羨之迴矚故能連擊縱便臨事莫違一起雲以高舉一

隨物以低飛馳逐妙於人智促節合於兵機禽雖小而
不陋獸雖捷而無依或則九霄擊下萬里接來風行電
轉月上雲開乍差池而不中終棄置而不迴彼俊異之
英決豈疑滯於嫌猜觀夫愛子防巖惜巢忌物叨戛戛
而雄厲翅翩翩而勁逸皆距者先中而命處絲蠻者異
狀而同疾苟精別而棲條同賞心而無失

奉和鵲賦 有序

唐高適

天寶初有自滑臺奉太守李公鵲賦以垂示適越在草

野才無能為尚懷知音遂作鵲賦其辭曰

夫何鵲之為用置之則已縱之無匹懷果斷之沉潛任
情性之敏疾頭小而銳氣雄而逸邈耿介以凌霜日精
明而點漆想像遼遠孤貞深密將必取而乃迴若受詞
而無失當白帝之用事下青霄而委質乃順節而勃然
因指縱而挺出嚴冬欲雪蔓草初焚野莽蕩而風緊天
崢嶸而日曛忿頑兔之狡伏恥高鳥之成羣始滅沒而
略地忽昇騰而躡雲翻決裂以電擊皆披靡而星分奔

走者折脇而絕脰鳴噪者血灑而毛紛雖百中而自我
終一呼而在君夫其左右更進縱橫發跡埽窟穴之凌
競振荆榛之折厯翕六翮以直上交雙指以迅擊合連
弩之應機類鳴騶之破的豁爾冒臆伊何凌厲以爽朗
曾莫薑芥豈虞夷險之怵惕觀其獲多不有得用非媒
歷閭闔以肅穆翊鈎陳以環回幸耀光於蒐狩承剪拂
於樓臺望鳳沼而輕舉紛羽族以驚猜路杳杳而何向
雲茫茫而不開鶯出谷而徒爾鶴乘軒而何哉彼懷毅

勇軾軻而棄置胡不效其間關而徘徊爾乃顧恩有地
戀主多情念層空而不去託虛室而無驚雅節表於能
讓義心激於效誠勢愈高而下急體彌重而飛輕戢羽
翼以受命若肝膽之必呈嗟日月之云邁猶羈縻而見
嬰別有橫大海而徑度順長風而一寫投足眇於巖顛
脫身逸於弋者冰落落以凝閉雪皚皚而飄灑諒堅銳
之時然寧苦寒以求捨匪聚食以祈滿聊擊羣以自解
比玄豹之潛形同幽人之在野矧其升巢絕壁獨立危

條心倏忽於萬里思超遙於九霄豈外物之能慕曷凡
禽之見邀未知鴛鴦之所以孰與夫鵬鷖之道遙云爾
哉

赤兔鵲賦

有序

元趙孟頫

皇慶元年上賜大都留守臣伯帖木兒白兔鵲一翎翮
皓潔白雪同皎至延祐元年凡三籠而毛羽變赤光采
豔奕異於尋常搏擊勇鷙加於疇昔雖老於五坊者亦
不知其所以然豈若君子進於德以潤質集賢學士趙

孟頫為之賦其辭曰

猗鷲禽兮出金門賜貴臣兮示殊恩色霜雪兮耀前軒
解條錠兮縱平原狐兔駭兮不及奔歷年歲兮耗如璫
粲晨霞兮炫朝暉剛氣勝兮肆飛騫德愈進兮義愈敦
炯雙眸兮睨乾坤

鷲賦 有序

魏 曹 植

鷲之為禽猛氣共鬪終無勝負期於必死遂賦之焉
美遐圻之偉鳥生太行之巖阻體貞剛之烈性亮乾德

之所輔戴毛角之雙立揚玄黃之勁羽其沈隕而重辱
有節俠之儀矩降居檀澤高處保岑遊不同嶺棲必異
林若有翻雄駭逝孤雌驚翔則長鳴挑敵鼓翼專場踰
高越壑雙不隻僵階侍斯珥俯耀文墀成武官之首飾
增庭燎之高輝

鷓鴣賦

魏王粲

惟茲鷓鴣之為鳥信才勇而勁武服乾剛之正氣被淳駘
之質羽翹晨風以羣鳴震聲發乎外寓厲廉風與猛節

超羣類而莫與惟膏薰之焚銷固自古之所咨逢虞人
而見獲遂囚執乎縲纆賴有司之圖功不開小而漏微
令薄軀以免害從孔鶴於園渚

鷦鷯賦

有序

晉張華

鷦鷯小鳥也生於蒿萊之間長於藩籬之下翔集尋常
之內而生生之理足矣色淺體陋不為人用形微處卑
物莫之害繁滋族類乘居匹遊翩翩然有以自樂也彼
鷺鷥鷓鴣鴻孔雀翡翠或陵赤霄之際或託絕垠之外翰

舉足以冲天背距足以自衛然皆負矰嬰繳羽毛入貢
何者有用於人也夫言有淺而可以託深類有微而可
以喻大故賦之云爾

何造化之多端兮播羣形於萬類惟鷦鷯之微禽兮亦
攝生而受氣育翱翔之陋體兮無玄黃以自貴毛不施
於器用兮肉不登乎俎味鷹鷂過猶俄翼兮尚何懼於
置罽翳蒼蒙龍是焉遊集飛不飄颺翔不翕習其居易
容其求易給巢林不過一枝每食不過數粒棲無所滯

遊無所盤匪陋荆棘匪榮萑蘭動翼而逸投足而安委
命順理與物無患伊茲禽之無知兮何處身之似智不
懷寶以賈害兮不飾表以招累靜守約而不矜動因循
以簡易任自然以為資無誘慕於世偽鵬鷖介其背距
鵠鷺軼於雲際鷓雞竄於幽險孔翠生乎遐裔彼晨鳧
與歸鴈又矯翼而增逝咸美羽而豐肌故無罪而皆斃
徒銜蘆以避繳終為戮於此世蒼鷹鷲而受縲鸚鵡慧
而入籠屈猛志以服養塊幽繫於九重變音聲以順旨

思摧翮而為庸戀鍾岱之林野慕隴坻之高松雖蒙幸
於今日未若疇昔之從容海鳥鷓鴣避風而至條枝巨
雀踰嶺自致提挈萬里飄颻逼畏夫惟體大妨物而形
瓌足瑋也陰陽陶蒸萬品一區巨細舛錯種繁類殊鷓
螟巢於蚊睫大鵬彌乎天隅將以上方不足而下比有
餘普天壤以遐觀吾又安知其大小之所如

鵲鳩賦 有序

唐喬琳

鵲鳩鷓鴣也詩取其鳴行搖尾相應以興兄弟急難之

義而已然無巢無雛不知棲息孳孕之所人之見者更無大小之殊隼不能搏彈不能射網罟不能取朝之與夕常在人間竟不知此鳥之所自來也

何鵲鴿之小鳥與羽族而特殊鷓鴣飛鳴肖翹畢逋金睛玉爪紺尾青顱電瞥機駭火馳風趨來何從而去何適似出有而入無噫形氣有生之類非卵則胎不巢則穴罕知爾棲泊之所乳伏之節吾自見爾翩翩一狀小大無別莫涯雛孕之源以出陶鈞之轍亦稱王母之使

豈在神仙之列味啄鋒銼毛衣霜雪惟若驚之近道思
數顧以周防苟彈射之莫中匪網罟而奚張齊姜所以
遣重耳范蠡所以逃越王慮晏安之有毒斯儆戒以為
良務相時而達變豈膠柱而守常偶來池館非意稻梁
吾將注目而悠然以逝色斯舉矣而物莫之傷既忘情
於進取遂遊仞以翱翔乘興於人間之世全身於自遠
之場苟日新於運用能獨善於行藏

哀鷓鴣賦 有序

宋梅堯臣

余得二鷓鴣飼之甚勤既久開籠肆其意其一翩然而
去其存者特愛焉鷓鴣於禽最有名頃未識也思持歸
中州與朋友共玩之凡養二年呼鳴日善罷官至蕪湖
一夕為鼠傷死遂作賦以哀云

物有小而名著亦有大而無聞吾於禽類得鷓鴣兮不
羣其音格磔其羽爛斑其生遐僻其趣幽閒飲啄乎水
喬棲翔乎竹間往咨羅者求之於野生致二雛形聲都
雅愛之蓄之籠之服之為日已久言馴熟兮縱晞朝旭

一逸而不復兮謂之背德非我族兮戀而不去尤可殺
兮晨啼暮宿何嗟獨兮固當攜之中國為士大夫之目
兮不意孽鼠事潛伏兮破笈嚙嗉何其酷兮嗚呼翻飛
遠逝不為失兮安然飽食不為福兮焉知不為名之累
兮焉知不為鬼所瞰而禍所速兮哀哉誠不如禿鶴鵝
鵬兮凡毛大軀妖鳴飫腹何文彩之佳何名譽之淑前
所謂大而無聞其自保而自足者與

雉賦

晉
孫楚

體沖和之淑質飾羽儀於茂林斑五色之文章揚皦皦
之清音設密網於巖阿飛輕繳之雲浮上無逃而弗獲
下無隱而不搜遂戢翼以就養隨籠棲而言歸恒逍遙
於階庭廕朝陽之盛暉

雉賦

晉傅玄

稟炎離之正氣應朱火之禎祥播五彩之繁縟被華文
而成章冠列角之盛儀翹從風而飄揚履巖距之武節
超鸞跖而鳳翔感天和而貽瑞進據鼎而祚商樂周道

之方隆敷皓質於越裳

雉賦

晉傅純

覽飛禽之可貴偉翔雉之嘉形應炎離之誕育包造化
之淳精鮮光皎粲麗采繁盈首同暉於昊天垂玄景之
綠青體等耀於方彩敷五色之華英

雉賦有序

宋王炎

之野外見一雉為野人所得悼其輕敵不戒而斃焉因
作賦以自警其辭曰

絳冠兮綠跗翠衿兮錦衣耿介兮自守雄鳴兮雌隨平
原兮淺草徐啄兮卑飛何野人之機巧乃以媒而致之
方氣驕而賈勇敢直前而不疑事常敗於輕敵碎身首
於須臾肉不登於鼎俎毛或用於旌旗子玉無禮而殞
命趙括狂勇而喪軀鄴舒怙俊而遭殺郤至稱伐而見
尸苟謀身之有累皆災害之所罹翠有羽而就羅難以
尾而為犧鴈不鳴而先烹鸚巧言而長羈信涉世之孔
艱雖後悔而何追惟羽族之至靈獨丹穴之鷓雛雛雛

兮音聲鏘鏘兮羽儀摩千仞而高翔豈矰繳之敢施茲
吉人之能事於鄙夫兮何誅

文雉賦 有序

明 高 出

野人貢雉畜之樊中感而賦之遂放之

惟機星之應象兮散羽族之奇芳羨文雉之麗采兮秉
耿介之殊方摯紀官於工正兮商徵翟以辨章諒華蟲
之登被兮來重譯乎越裳竭雉鼎之為妖兮匪集庭之
兆祥感朝飛於嶧桐兮歎色舉於山梁爾其族則為鳴

逢分恥求敵之媒
因爾其丘壟
且翔樊籠晚棲草澤風
乖圉圉見羈岑丘違夢鼎俎靡辭絕
偶鸞驚敢厭家雞
從鳳遊兮不揣中搏擊兮無時皋隰淹兮遠道尉且往
兮中疑款黃金之麓笥惜羽毛而長饑遜中牟之表異
靡稻粱兮羞之鳩鵲巢兮自婀娜晨風鳴兮獨向我忽
東西兮無人賈鍛翻兮旋隨燕雀賀兮啾啾鸚鵡嘲語
兮不下尋喋喑以無聲聊委蛇兮無不可幸射矢兮不
及况鷹鷂兮遠禍每低頭而愁思鬱于其悶坐不見

夫王孫公子兮挾金丸而馳逐朝深灌兮暮陵谷馴媒
翳兮夸矜獲調酸鹹兮恣膏肉博佳人兮一笑尚從禽
兮未足審伏機兮慎哉願致聲兮吾族苟得意兮恭飼
即蒙恩兮浩蕩無銜環之明報忍決起兮飽颺豈獨驕
之難調徒相忘於得喪亂曰菀彼中林何輪囷兮寄息
未忝慚澠忍兮柔道利生苟離窘兮次且不去聊任運
兮斑尾毳毳潛垂淚兮耳目何玩空憔悴兮庶幾縱我
荷嘉惠兮郊壠無恙請從此逝兮

感雉鳴賦

元

任士林

余歸山之明日甲子日斜有鳥有鳥鳴於竹西頰冠綺
翼紺趾雕題余睨而視之曰此殆丹鳳之儔邪嗟乎哉
山梁之雉也亦何為爾栖栖者歟鳴聲益和如語以臆
曰承后皇之嘉惠胚太和於卵翼攬草木之清麗濯雲
煙之絢碧被文繡於外體抽肺肝之五色將自拔於羣
飛羌好脩而強飾吁嗟乎余身之章兮又安知非余身
之賊祝網密而羣空虞機張而羽積林無全殼野絕胎

息觸冒星之紛然聊擇音於彼木濯余羽兮清泉充余
枵兮棟實固將坐錦衣於泥塗被黼藻於荆棘者與悲
夫太上貴質其次有文文而好自用斯為下矣猩血染
而管泣象齒幾而身靡鷹能搏而困軒楹馬能馳而厄
鞭箠龜以笑焦翡翠以毛死是故君子不失足於人而黃
中通理也弔正平之鸚鵡悼賈傅之飛鵬訪稽氏之昂
鶴睇楊家之舐犢拜自獻者何心祇腥臊乎偃肉已矣
乎春山空兮春水頽春雨零兮春草肥天地為樊兮日

月為戰優哉游哉兮飲渴食飢卻鐘鼓於魯饗謝簫韶
於舜儀被霧中之玄隱固將有感於陶妃

鬪雞賦

晉傅玄

玄羽黜而含曜兮素毛頰而揚精紅縹廁於微黃兮翠
彩蔚而流青五色錯而成文兮質光麗而豐盈前看如
倒傍視如傾目象規作齒似削成高鷹峭峙雙翅齊平
躍身竦體怒勢橫生爪似鍊鋼目如奔星揚翹因風撫
翮長鳴猛志橫逸勢凌天廷或躑躅踟躕或囁喋容與

或爬地俯仰或撫翼未舉或狼顧鳩視或鸞翔鵠舞或
佯背而引敵或畢命於彊禦於是紛紜翕赫雷合電擊
爭奮身而相戟兮競隼鷲而鵬睨得勢者凌九天失據
者淪九地徒觀其戰也則距不虛挂翮不徒拊意如饑
鷹勢如逸虎

長鳴鷄賦

晉習 嘏

嘉鳴雞之令美智窮神而入靈審璇璣之迴遽定昏明
之至精應青陽於將旦忽鵠立而鳳停乃拊翼以讚時

遂延頸而長鳴若乃本其形像詳其羽儀朱冠玉璫彤
素並施紛葩赫奕五色流離殊姿豔溢彩耀華披雍容
鬱茂飄飄風靡扇六翮以增暉舒毳毛而下垂遠雙距
之岷峨曳長尾之逶迤

木雞賦

以致此無敵故
能先鳴為韻

唐
浩虛舟

惟昔有人心至術精得雞之情情可馴而無小無大術
既盡而不飛不鳴對勁敵以自持堅如挺植登廣場而
莫顧混若削成初其教以自然誘之不懼希漸染而能

化將枯槁而是喻質殊撲斲用明不競之由狀匪雕鏤
蓋取無情之故然則飲啄必異嬉遊每殊竚棲心而自
若期顧敵而如無日就月將功盡而稍同顛柝不震不
悚性成而漸若朽株已而芥羽詎設雕籠莫閉卓然之
至全變兀若之姿已致首圓脰直輪桶之狀俱呈皆利
距銛枳枸之銳並利是以縱逸情絕端良氣全臆離披
而踵附眸眩曜而節穿驚被文而錦翼蔚矣迷擧木而
花冠爛然虛憍者懷不才之虞安能自恃賈勇者有攻

堅之懼莫敢爭先故能進異激昂處同虛寂郢工誤起
乎心匠邱氏徒驚乎目擊澹然無撓子綦之質方儔確
爾不回周勃之強未敵其喻斯在其由可徵馴致已忘
乎力制積習漸通乎性能是則語南國者未足與議鬪
東郊者無德而稱士有特立自持端然不倚塊其形而
與木無二灰其心而顧雞若是彼靜勝之深冀一鳴而
在此

雞鳴賦

宋

張耒

先生閒居學道昧旦而興家畜一雞司晨而鳴畜之既
老語默有程意氣武毅被服鮮明莪莪朱冠丹頸玄膺
蒼距矯攫秀尾翹騰奉職有恪徐步我庭啄粟飲水孔
肅靡爭山川蒼蒼風霰宵凝黯幽牕之沈沈恍余夢之
初驚萬里一寂鐘鼓無聲聞振衣之膈膊忽孤奏而冷
冷委更籌之雜亂和城角之淒清應雲外之鳴鴻弔山
巔之落星歌三終而復寂夜五分而既更萬境皆作車
運馬行先生杖屨而出觀大明之東生

雞鳴賦

元 胡炳文

亥子混沌人物鴻濛汝喔喔兮初動日杲杲兮將東雷
之驚蟄也一歲云始汝之驚人也是鼓兩翼兮
有聲作羣動兮不已舜蹠之徒其趨也異此時聞之皆
寤而起暨汝再鳴日將中矣悠悠者晝寢營營者趨市
鳴何殊哉聞者異耳故或名汝以翰音或呼汝以司晨
或以朱而著姓或以碧而稱神孰知真機之自動無如
旦氣之方新彼方同夢也此足以轟姪怠者之耳彼未

起舞也此足以激忠義者之心至於食必呼儔鬪不留
怒被服孔文爪距翼武羣出以朝羣棲以暮動靜不失
其時風雨不改其度聲者雄而牝者不敢與之雙唱者
一而和者不可知其數是皆見於已鳴之後而不知其
已鳴之故萬籟無聲一天微露汝之初鳴乾將闢戶是
謂一日之貞下起元而天地人物之一寤蓋得乾坤之
初者震巽乾坤之中為坎離坎司子之候離當午之時
汝巽禽也乃通坎離之道而知夫子午天地之中正卯

酉陰陽之出入陰之精而澤於陽月之象而影於日汝
之初鳴日猶未出於此之時子以悟無極之真午以見
道心惟一孜孜為善守而勿失舜人也我亦人也如之
何其不可及也夫

翰音賦

元任士林

若知雞乎錦衣繡翼孤味莪冠被鳳之彩插鶴之翰音
聲浚美容止輕鮮遡羽族之稠濁諒五德之獨全然而
沐浴泥沙步啄蟲豸曉樹棲早晚柵藏矮朱朱甯甯進

退失解夫豈慕鳳凰之戀匹仰鷹鷂而護雛不借力於
九萬遂扶搖之所圖鸞鳩槍榆烏鵲遠月背啄非雄羽
毛未刷猶決起而驚飛吾何獨守此桀也爾則明河在
天曙色上戶一振聲於兩翮若怒飛而遠翥勢甚超凌
力則困阻氣亦飄揚身不能舉如長沙之誼蠶室之遷
過永之柳謫潮之韓匪志氣之不厲獨墜影於孤騫既
漆我羽又槌我距謝雲霄之羽儀抱村落之風雨恫升
躓之有命匪軒沈之在人聞爰居之蹭蹬亦避風乎魯

門

雞子賦

元涂幾

二儀肇分厥生不息太和絪縕羣命斯植有物於此兮
不方而圓包括二質兮陰陽具全金玉發耀兮互相裹
纏外固內藏兮剛柔以宣清濁未判兮渾渾其天無首
無趾兮突然而然元氣密受兮母以子傳野人不識兮
請占筮筮曰此先天混沌之體歟抑胚暉品彙之有始
歟非溫而溫生於天一之水歟非燥而燥成於真陽之

氣歟守雌抱一靜以為其理歟抑知時啐啄喑喑而行
地者歟一族百產前鉅後細非黃非白圓轉譎詭充飽
作餅便利老齒惟此獨能請賦雞子

御定歷代賦彙卷一百三十二

謹案卷一百三十一第一頁後六行以芳天曉景
悅聽清音為韻刊本悅訛晚據咸平集改

第十五頁後七行棲止遐深刊本止訛心據唐文
粹改

第十六頁後三行以其標自然之靜刊本其訛至
據唐文粹改

第十六頁後八行顧疎野之賤迹刊本賤訛踐據
唐文粹改

卷一百三十二第一頁前六行梢勁翮刊本翮
訛翻據唐文粹改

第二頁後六行寧掩羣而盡取刊本盡訛進據唐
文粹改



總校官庶吉士臣張能照

校對官庶吉士臣章宗瀛

謄錄監生臣李德